


[www.BibleForChildren.org](http://www.BibleForChildren.org)

# Aba Vatowo 1




Aba vatowo goi Yaubada  
kaga liliuuna iwodugudi,  
nakaē yábana  
be poyapoya.




Ego poyapoyayana ame geya ana katubayasinamo be  
nakae daakakaina. Go madabokina  
bwaē dimówana ilatao.

Dimowanayana yatanaina goi  
kokonótuya gagaina  
ikaaiyaka nakae  
Yaubada Balomaina  
itaakavata.




E Yaubada sopana goi imadágina idigo kana, 'Mavada kusowōduwo!' E mavadayana isowóduwo. E mavadayana ivayou maliyalina go, kokonotuyayana ivayou sabamgo. Lavilavi ima namlieta nobuyana ima. Moe maliyalina vakuumgoina bogina ikavava.



E Yaubada sopana goi imadágina idigo kana,  
'Sekulapeya kusowōduwo go, bwaē kuwotāi.'  
Sekulapeyayana ivayoko yábana. Lavilavi ima namlieta  
nobuyana ima. Moe maliyalina aiyuwaina bogina  
ikavava.



E Yaubada sopana goi imadágina idigo kana, 'Bwae ditonema, kōna dadava tayamo goi kolamgōgana bei dadava tayamo sayasayaina isowóduwo!' E tauna nakae isowóduwo. Imadagi ikavava, dadavayana sayasayaina ivayoko poyapoya go, bwaeyana ivayoko négwasa. Igitedi dedevidi, e iuyaonedi.




Aiyuwaina Yaubada idigo kana, 'Poyapoya, kom goi  
náuna sisūsuwo go, limou sidīdi be nakae kokowoika  
keuwoidi sikéuwo, taudi nakae ma  
kutukutudi.' E tauna nakae  
isowóduwo. Lavilavi ima  
namlieta nobuyana ima.  
Moe maliyalina aitonina

bogina ikavava.




Aba mavadayadi aiyuwo gagaidi iwodugudi, tayamo  
gagaina toina moe maliyalina iloovinae  
go, tayamo tupwana giyaina moe  
sabamgo iloovinae. Go utuna nakae  
taiyao iwodugudi. Lavilavi ima  
namlieta nobuyana ima. Moe  
maliyalina aivasina bogina ikavava.




E Yaubada sopana goi  
imadágina idigo kana,  
'Négwasa iyaiyanimi  
badabadaimi kosowōduwo!  
Nakae mánuwo  
kosowōduwo, e poyapoya  
yábana osasaidi goi  
koyovayōva!' Laviavi ima  
namlieta nobuyana ima. Moe  
maliyalina ainimaina bogina  
ikavava.




E Yaubada sopana goi imadágina idigo kana, 'Poyapoya, kom goi kaga liliuna maa yawoidi sisowōduwo, maisidi taudi nakae, yoguyogu daladalaidi, bolitavanu be woiwoi, gagaidi be giyaidi.' E tauna nakae sisowóduwo.




E Yaubada sopana goi imadágina idigo kana, 'Tomota taodugūdi ada tapata, tauyadi kita nakae. Tauna íyana, mánuwo, bolitavanu, yoguyogu daladalaidi be nakae kaga liliuna maa yawoidi poyapoya ame goi sikaaiyaka bei sikalibubudi.' Kaga liliuna Yaubada bogina iwoodugudi igitedi madabokina moe dedevidi, e iuyaonedi gagaina. Lavilavi ima namlieta nobuyana ima. Moe maliyalina ainima tayamoina bogina ikavava.



E korotoyana kina Yauwe Yaubada ikabi, tánuwo Ideni  
goi iyato bei ipaaisewa Yaubada umana be nakae  
tanuwoyana imataakavate.




Iyato ikavava, ina lovina  
ivini idigo kana, 'Alova  
keuwoidi madabokidi  
tānuwo goi atagonem  
kukanidi go, dedevina  
be goyo adi nanamsa  
alovaina taabu  
kukanikāni. Neta  
kukani, e moitamo toina  
bei kukámasa. Tauna  
taabu kukanikāni.'



Tuwo moitamó korotoyana  
yoguyogu be mánuwo be woiwoi  
liliudi ivayoudi go, geya kada  
tayaamo yoguyogu itoboine bei  
tauyana ina tovaita geya.



Tauna korotoyana matamasimasisi gagaina kina Yauwe  
Yaubada ivini ikanamatáiya. Ikanaamatáiya go,  
korotoyana silalumina tayamo ikabi, íwaya iyato,  
silaluminayana kiyaua  
ivasumapu. Ivasumapu  
ikavava, silaluminayana  
ikabi, vavina iwodugu.  
Iwodugu ikavava,  
ikabi ime korotoyana  
yaina.




E tauna moe pasina koroto tamana be  
sinana yaidi itumasaba go, monena  
taiyao situyuwo, tauna adi  
taiyuwokova wowodi tayamo.



Ame moitamo. Yaubada  
imatakoiyeda ame nakae: Natuna  
kaakesaina ikasale bego avatau neta  
inumise, bei geya ikamasete, go  
sem maa yawoina vata.



1



60



Roma 3:23 Madabokiida, Diyuu be Totuyoyowo, bogina tagoyo, e Yaubada ana tomoeeyalina tapoikiki bego yaida goi itakanukanunu go, geya itoboinedeta.

Roma 6:23 Moe moitamo. Goyo ana katumapu moe ámasa go, Yaubada ina yabobona iviniibesoida moe yawoida vata ida spwagógana ida Tomoya Yeisu taiyao pasina.

Iberiu 9:27 Kita tomota liliuda ada lovina ikaaiyaka bego sivatayamo bei takámasa namlieta takínona ana tuta.

Epeso 2:8,9 Moitamo. Yaubada ina kanuwóiya goi bogina iyaveda numisa pasina go, yavayana unana moe geya kita toinida ida guinuwa goi geya. Moe Yaubada ina yabobona goi. Geya ida guinuwa goi geya, govila bei tagágasa.



Roma 10:9,10 bego neta sopada goi takatomoyae kina Tomoya be nakae ateda goi tanumisa bego Yaubada tokámasa yaidi goi ikaitáoe, e ada yava bei tababane. Moitamo. Ateda goi tanumisa, tauna kita Yaubada matana goi kiboobosida. E sopada goi Yeisu takatomoyae bego Tauyana Tomoya, e bei ada yava tababane.

Iyoni 3:16,17 Ame moitamo. Yaubada imatakoiyeda ame nakae: Natuna kaakesaina ikasale bego avatau neta inumise, bei geya ikamaseta, go sem maa yawoina vata. Moitamo. Yaubada Natuna ietune ima poyapoya ame goi geya kada bego da poyapoya itakinoida toogoyoida ida goyo pasidi geya, go sem bego Natunayana goi iyaveda.



1 Iyoni 5:11-13 Ina talavaitayana ame nakae: Yaubada yawoida vata bogina ivinida go, yawoida vatayana ida Natuna taiyao pasina tababane. Avatauwa neta Yaubada Natuna taiyao siispwagógana, maa yawoidi vau. Go avatauwa neta Yaubada Natuna taiyao geya sispwagogoneta, e geya yawoidimo. Ame livalayadi bogina aginidi siwo yaimi bego komi Yaubada Natuna ana tonumisayao bei koyagoi bego bogina maa yawoimi vata.



# Aba Vatowo 1-2

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: Bob Davies; Tammy S.

Gumawana Bible (gvs) © 2019, Wycliffe Bible  
Translators, Inc. All rights reserved.

<https://www.bible.com/bible/3576/MAT.1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

